

Early European Books, Copyright © 2012 ProQuest LLC. Images reproduced by courtesy of The Wellcome Trust, London. 3679/A






Early European Books, Copyright © 2012 ProQuest LLC. Images reproduced by courtesy of The Wellcome Trust, London. 3679/A









Early European Books, Copyright © 2012 ProQuest LLC. Images reproduced by courtesy of The Wellcome Trust, London 3679/A

1) can rigal your sor - Distrock for w a plating to compoun Decis mitrig " Daws Chlory Myuno 970 I or potable v. tenila. To Le configure D'or pour milandi : Emm. 2. 20m, ary La livuel Ele D'anipewi. The on The It goutter for ge Nois les dept mitant corregs us y



Early European Books, Copyright © 2012 ProQuest LLC. Images reproduced by courtesy of The Wellcome Trust, London. 3679/A

DISCOVRS

DES ADMIRABLES

VERTUS DE L'OR-POTABLE:

Auquel sont traictez les principaux fondemens de la medicine, l'origine & cause de toutes maladies, & quels sont les medicamens plus propres à leur guerison, & à la conservation de la santé humaine: Composé par le sieur de la Tourrete, n'aguieres President des generaux maistres des monnoyes de France.

Dedié au Roy Treschrestien.

AVEC VNE APOLOGIE DE LA tresveile science d'Alchimie, rant contre ceux qui la blasment, qu'aussi contre les faulsaires, larrons & trompeurs qui en abusent, par le mesme Autheur.


Dediée à monseigneur le Duc de Nemours & de Geneuois.



A LYON,

Imprimé par Pierre Roussin, pour ledice Sieur de la Tourrete.

1575



Early European Books, Copyright © 2012 ProQuest LLC. Images reproduced by courtesy of The Wellcome Trust, London. 3679/A





IRE, apres auoir seruy l'espace de vingtcinq ans trois de vos
predecesseurs Roys en
l'ossice de president en
la court des generaux
de voz monnoves, ie
nav pas faist grand'

dissiculté de me despouiller d'une telle dignité, ensemble de toutes autres charges publicques, tant honorables quelles peussent estre, pour resourner à mon petit champestre, comme homme priué passer le reste de mes jours, s'il plet à Dieu my conseruer le repos tel que je desire, selon

A 2

sa bonne volonté, & soubz la protection de vostre royalle Maiesté: mestant remis deuat les yeux le faict de ce grad capitaine Romain Marcus Curius, qui fut trouué en sa grange pelant des naueaux pour mettre dans son pot, par les ambassadeurs des Samnites, lesquels il auoit peu de temps au parauant subiuguez par armes, & submis à l'empire Romain. Ainsi viuant en ma solitude i'ay reprins les erres de mes anciens estudes, & principalement sur la Philosophie, qui enseigne de cognoistre la nature, auec son ordre en toutes choses par elle composees, les vertus & proprietez d'icelles, la sympathie & antipathie des vnes auec les autres, & finalement en quelle maniere l'home (pour lequel Dieu les atoutes creées) s'en doit seruir, tant pour sa conseruation que aussi pour la restauration, à fin qu'il viue saynement & longuement en ce monde, qui est le plus grand tresor qu'on se sauroit iamais acquerir. Car encore que chacun se trauaille țant qu'il voudra l'esprit & le corps ensem ble, auec tous les perils & hasards du mon de pour amasser quelque bien terrien, tout cela n'est que pour sa vie & nourriture. Mais

Mais voicy le malheur, Sire, d'autant que celuy qui ne s'est iamais estudié sinon damasser or, argent, ou grand cheuance, communement il en a le moins de plaisir, soit pour n'en sçauoir bien vser, ou par ce que Dieu le punit de son auarice luy accourcissant le terme de sa vie, oubien l'affligeant de grieues maladies ce pendant qu'il vit en ce monde, & qu'il se faict vn Dieu de son tresor. De telles gens a parlé ce grand Cato Romain, disant, Que le malade riche a des escus à grand planté, mais il n'a pas soy mesme. Et à la verité, bien est pauure celuy qui n'a point de santé: quand il auroit cent mille escus en ses coffres, & autant de rante, ce n'est rien si son corps est infecté & tourmenté de ladrerye, hydropisie, paralisie, epilepsie, ou de gouttes & podagres auec douleurs extremes, qui le prouoqueront à renier & despiter Dieu & toute la cour celeste, plus de cent fois le iour, & autant la nuiet. Tels personnages sont encor de pire condition que ne fut Tantalus: car ayans la bonne viande suspendue iusques au nez, ils n'y peuuent attaindre pour la manger, & pareillement le breuuaige delicieux abon-Jedan

dant jusques au manton, ils ne se peuuent abaisser pour en boire: & par ainsi se meurent miserablement de malle rage de faim & de soif aupres de leurs grands tresors & cheuances. Je mets en auant ces choses Sire, non pour reprouuer les richesses : car elles ne sont que bonnes aux bons, qui en sçauent bien vser: ni aussi pour louer la pauureté dont Codrus, Liberides, Bias, Diogenes & quelques autres Philosophes ont faict grande vertu: par ce que ie sçay fort bien comment la plus grande tentation, qui puissent aduenir aux humains pour les faire trebucher à tout genre de vice, prouient de l'indigence. Et quoy que soit, les plus constans & plus sublimes esprits qui pourroyent voltiger iusques au plus hault ciel en speculations honestes & vertueuses, entreprendre & mener à bonne fin de grandes choses, en demeurent abaissez & come du tout supprimez: Mais seulement ie le dis, à sin de reueiller la stupidité de ceux, qui ne sçauent & ne veullent apprendre le droit vsage de leursdictes richesses, premierement pour eux mesines, & secondement pour leur prochain selon le commandement de Dieu, leque

lequel ne les donne que pour ceste fin seu lement à qui luy plaict. Or ayant des pieç'a consideré toutes ces choses Sire, & depuis ma retraire conioint à mes estudes la practique manuelle, auec plusieurs belles experiences de ce que Dieu par sa bon té immense a voulu mettre en la nature pour le seruice de l'hôme, i'ay trouué entre autres la maniere de faire le vray Orpotable des anciens, auec conservation de sa pure essence, & vertu naturelle, sans y faire entrer aucun corrolif qui soit malfaisant au corps humain. Et vous ose bien asseurer Sire, que c'est la souveraine medicine, non seulement pour guerir de toutes maladies corporelles, mais aussi pour conseruer la santé, force & ieunesse par longues annees iusques au dernier periode de la vie humaine: 82 par consequent ie puis dire veritablement, & sans cacher vn tel benefice qu'il a pleu à Dieu me departir, que faisant offre à voltre Maiesté de mondit or potable, ie luy donne la plus excellente chose. quissoit sur la terre, comme aussi vous estes le phis exceller Roy terrien, & digne d'vn tel present. Auec ce ie luy presente en toute humilité vn bref discours des vertus

Hairt

EPISTRE.

admirables de cest or potable, que i'ay coposé en traittant le subiect: & l'ay mis volontairement en lumiere, pour essayersi durant vostre regne & sous vostre faueur Sire, l'vsage de ceste precieuse liqueur d'or potable pourtoit estre remis sus au benefice des humains. Ie me tiens fort asseuré, que comme plusieurs homes sauas & vertueux le trouueront singulierement bon, aussi s'en trouuera il d'autres, qui sans iugement, ou par quelque manuaise intention le refuteront ou contemneront : aufquels aussi ie reserue bien ample replique sur tous les poinets de la philosophie & me decine, que l'ay deduits par icelus mien discours, encores que ie n'en ave fait ma profession principale insques à present. Et s'ils me veulent redarguer d'anoir mis ma faucille à la moisson d'autruy, ie leur respons dés maintenant, que chacun doit sauoir & cognoistre ce qui luy touche de si pres, comme est sa vie & sa mort, sans colloquer tant sa confiance en ceux, qui n'exercent la medecine sinon pour le gain:& sous couleur d'vn riltre de medecin font tant d'experiences de leur science incertaine au peril de la vie des hommes.Reser uant

uant toutesfois l'honneur des bons qui l'exercent cordialement, auecques vn tel soing qui est requis pour rendre la santé à leurs malades: car à ceux là ie porte & porteray toute ma vie respect & honneur, ainsi que Dieu l'a commandé par expres:sachat tresbié que la medecine ensemble le medecin sont creez & ordonnez de luy pour subuenir aux necessitez des humains. Ie supplie donques treshumblement vostre Royale maiesté Sire, que son bon plaisir soit de receuoir ce mien present d'aussi bonne affection que ie le donne pour tesmoignage de ma treshumble seruitude & obeissance, priant Dieu qu'il la conserue en tresparfaite santé, tres heureuse & treslongue vie, auec tout accroissement d'hon neur & de grandeur. A Lyon ce 15. iour de lanuier 1575.

> De vostre Maiesté le tres humble & tres obeissant serviteur & suiet Alexandre de la Tourrete.

. n Triad.

urner merendie i homonour des bous mei le my rougague, premoniono bre en foing and eferequis pour rendre la fante a ions and other are dense is in more as par-THE TO THE PICTURE PROPERTY SET OF STREET WELLS que l'heur acommunit par questiches treshie que la medecine entemble le medocument creez scontemes de lay pour inbutenir aux necessies des humanns. Ic hippire danques recommidement voltre Royale materie Sire, que fon hon planti fort de recenoir ce mon prefent d'amili bonne affection que ie le donne pour retimoignage de ma treshomble féruitaide at obcidince, prienci lieu qu'il la conferne envietparfaire fant gres incurente et reflongue vie, ance rour secrentlement d'hon new or de grandeur. A Lyon ce 15 iour de Lamide: 15

De voltre Marché le tres humbie Serres oberfine fermeur & foriet Alexandre de la Tourrere.



BREFODISCOURS

admirables vertus de l'Orportable, auquel sont traictez les principaux fondemens de la medecine, l'origine & cause de toutes maladies, & quelz sont les medicamens plus propres à leur guerison, & à la conservation de la santé humaine: composé par le sieur de la Tourrete n'aguieres Président des generaux maistres des monnoyes de France,

E so vver ain die v eternel & tout puissant, qui de saseulle parolle a creé le ciel, la terre, & les eaux, auec tous les animaux, vegetaux

& mmeraux, estans en iceux, pour le dernier crea l'homme à son image & semblan ce, comme son chef d'œuure parfaict en toute sapience, & vraye cognoissance de tout ce, qui estoit en la nature : luy donnat en outre plein pounoir & seigneurie sur toutes autres creatures, à sin qu'il s'en seruist pour l'entretenement & conservation de sa santé & longue vie, iusques à son der nier periode. Au moyé de quoy le premier homme ainsi creé, & plusieurs de ses successeurs és premiers siecles ont vescu sains & robustes par l'espace de neuf cés, & iusques à mille ans. Ie parle sans aucun sophisme des ans aussi longs que les nostres, qui sont composez de douze mois, ou quoy que soit de douze lunes, chaque lune de trente iours, & chacun iour naturel de vingt quarre heures: ainsi qu'il se prouue par le texte de l'escriture sainste en plusieurs passages du Genese, & d'autres liures tant sacrez que prophanes.

Ces premiers hommes au moyen de la fapience qu'ils avoiét receue de Dieu, ont tresbien cogneu les vertus & proprietez speciales d'vn chacun simple d'entre les-dits amimaux vegetaux & mineraux, les-quelles vertus estans encloses au prosond de leur masse corporelle entre l'eau phlegmatique & la terre sulphuree ils ont trouuces, & extraites bien dextrement par l'art chimique, separant le gros du subtil, & le pur de l'impur: & apres s'en sont seruis come de choses que Dieu avoit mises en leur puissance

puissance pour la conservation de leur san té & longue vie. Cela nous enseigne, que pour trouver & extraire la vertu de tous les simples du monde, estans composez de trois choses en leur premiere matiere, come nous dirons cy apres, il les faut premie rement discoposer, corropre, & priver tota lement de la forme q nature leur a baillee: apres en separer les elemés, iceux rectifier, & de nouveau conioindre en vn corps plus parfait & mieux téperé qu'il n'estoit, & en ce faisant considerer l'element predominant, à sin de cognoistre parfaitement la vertu de la chose qu'on veut avoir, & par consequent à quel vsage doit servir.

Car l'experience nous monstre clairement, que ceste grosse masse du corps, laquelle cache dans soy, & en son centre l'esprit vigoureux de la chose comme dit est, luy empesche de produire en essect sa vertu: ou pour le moins la luy diminue tellement, qu'il ne peut faire son action que bien petite, au respect de ce qu'il fait lors, qu'il est tiré de sa prison: & qui pis est, l'estomac de l'homme se trauaille grandemét, & en trauaillant se debilite tant, qu'il ne peut bonnemet digerer vne telle masse

DISCOVES

du medicament administré sans ladite separation chimique, estant ce pauure estomac contraint de suppleer la negligence du medecin & de l'aporhicaire, lesquels n'ont sceu, ou voulu prendre la peine de faire ladite separatio par bon art. Dequoy certainement il advient, que tels medicamens ainsi qu'ils sont communement administrez auec leur marc sans aucune sepa ration ne purification profitent peu: & le plus souuent nuisent aux malades, en augmentant leurs maladies, ou leur en engendrat de nouvelles, apres leur avoir sustrait la chaleur naturelle de l'estomac, de façon qu'il ne peut plus digerer la viande ordinaire si bien qu'il deuroit. Et par consequet si la premiere digestion de l'estomac n'est bonne, le fove, qui fait la seconde digestion, n'y peut trouuer de quoy faire bon sang, pour l'enuoyer & distribuer par les veines à tous les autres membres du corps. En apres aussi les roignons, ou se fait la troi sieme digestion, ny trouuent substance necessaire à leur entretenement pour la retenir, ains laisse nt tout couler par les coduits de l'vrine, laquelle par apres se voit toute erue & indigeste, sans toutesfois cofiderer siderer la vraye cause de tous ces maunais accidens, qui est celle que dessus.

Or pour faire ladite separation & purisication par art chimique, il est requistout premierement d'entendre l'ordreque nature a tenu en la composition de chacun corps, & de quelle matiere il est composé: i'appelle corps en general toute chose qui se peut voir & toucher. La commune opinion est, que tous corps sont composez des quatre elemens, terre, eau, air, & feu, mais ce n'est pas assez dit : car qui est celuy qui s'osera vanter d'auoir onques veu ne touché l'vn d'iceux tout pur en son essence? Certes il ne se void terre quine contienne le feu, ne aucun feu sans air, ny air sans eau, & puis encore de la grossesse de l'eau s'engendre la terre: de saçon que l'art de separation ne peut ramener vn chacun elemét par soy en sa simplicité: mais sont & demeu rent toussours en forme corporelle, visible & palpable elemens elementez, & participans l'vn de l'autre: combien qu'en chacun simple, soit animal vegetal ou mineral, y ait vn element predominant, qui fait cognoistre sa vertu & puissance.

Donques il faut passer plus auant, &

monstrer comme au doigt & à l'œil quelle est la matiere d'vn chacun corps, soit sensible ou insensible: de quoy il est composé, comment il est conserué en son entier: & sinalement comme il se peut discomposer & corrompre en retrogradant l'ordre de nature, pour venir à ladite separation. De là aussi nous entendrons par quels moyens s'entretient la vie humaine, & la conseruation de la fanté: ensemble la restauration apres les accidens de toutes sortes de maladies, qui nous assaillet iournellemet.

Partant ie dis pour ma principale maxime, que tous corps generalement sont coposez de trois choses diverses, & ayans leurs facultez ou vertus distinctes & separces: lesquelles trois choses estans bien coniointes & vnies en droite proportion font vn corps temperé. Ces trois premieres choses sont soulphre, mercure & sel.Le soulphre est l'huyle ou resine du corps, qui confient en soy le feu de nature nourricier & consernateur de la vie. Le mercure est vne simple & pure liqueur diffuse par tout le corps, & cause essiciente de la continuité d'iceluy, laquelle contient en soy l'esprit de vie. Le sel est comme l'ame, & moyen

moyen de conioindre ensemble les deux extremes de l'esprit & du corps, à sauoir du mercure & du soulphre, ayant encore proprietez naturelles de coaguler, purger, mundifier, & par consequent de conseruer le corps en incorruptibilité: à cause de quoy aussi est appellé des Phisiciens le

vray baulme de nature.

Ces trois, soulphre, mercure, & sel en tous corps sont bien separables, & apres leur separation se peutuent toucher & voir au doigt & à l'œil chacun distinctement en son essence. Exemple grossier, qu'on prenne quelque animal que ce soit, pareillement vn des vegetaux, comme sont herbes & arbres, les mettant au feu ils sont bien tost enslammez: ce que ne pourroyét estre, s'ils ne contenoyét soulphre de mesme qualité ignee. S'enflammans ainsi le mercure fuit, & s'en vole par l'air, sinon qu'il soit retenu & recueilli par artifice. Et apres la separation dudit mercure le corps demeure destruit en cendre, qui est la fece du soulphre, de la quelle cédre se tire le sel par lexiue, filtration, & enaporatio de l'eau iusques à parfaite coagulation sur le seu, ou au soleil, ainsi qu'on fait le sel comun.

Le semblable, mais auec plus grande industrie, se peut faire de tous corps plus solides, comme sont les metalliques & mineraux, selon l'art spagirique bien enten-

due, & practiquee de mesmes.

Tenant donques pour constant ce prin cipe, que tous corps sont coposez de soulphre, mercure & sel en droite proportion, & conioints en parfaite vnité, il s'ensuit que la santé & la vie humaine sont conser uez sans aucune dissolution ne alteration tant & si longuement, que ces trois choses y peuuent demeurer en telle vnion & tem perature. Au contraire, si par quelque mau uais accident l'vne d'icelles se desbande, comme il aduient ordinairement par le nourrissement de mauuaises viandes, & de mauuais breuuages, ou par trop boire, man ger, hater les femmes, & trauailler le corps: ou par peu, comme font ceux qui demeurent oisifs, ou qui demeinent vne vie sedentaire, ne trauaillans que de l'esprit sans exercice corporel: ou qui endurent faim, stoid, frayeurs, & autres diuers accidens: En ces cas, dis ie, il s'ensuit alteration de la santé, & generation de toutes maladies pour le desreiglement de l'vn des trois, ou de de deux, & aucunes fois de tous les trois ensemble, qui sont les soulphre, mercure, & sel dessusdits.

Or pour cognoistre lequel de ces trois est alteré, consequemment la cause de la maladie, & icelle maladie mesme telle qu'elle est en son anathomie, il faut presup poser, que le soulphre estant par excez enflammé s'en va droit assaillir & eschausser outre mesure les principaux membres interieurs, à sauoir le cœur, le soye, les reins, & le cerueau, dont s'engendrent toutes maladies chaudes & aigues, comme sont sieures, pleuresies, pestes, epilepsie, manie, frenesie, & c. les quelles se doyuent proprement appeller maladies sulphurces.

Le sel venant à se dissoudre par l'vn desdits accidens engendre toutes les maladies, qui sont par dessuxions, comme catarres, apoplexie, squinancie, hydropisse, flux de ventre, dysenterie, lyenterie, dyarrhee, &c. En ce faisant il s'escoule du corps peu à peu, tant qu'à la fin tout le sang humain, & la chair mesme se trouuans priuez de ce sel, qui est leur baume naturel, viennent à corruption. Et de là s'engendrent aussi tous viceres malins, tant internes que

B 2

externes, polypus, noli me tangere, chancres, loups, fistules, ensemble toutes les six especes de lepre, qui meinent tout le corps humain à pourriture de peu à peu, selon & à mesure que ledit sel y vient à diminuer, & defaillir: parquoy toutes ces maladies se doyuent proprement appeller salees.

Touchant au mercure il ne s'altere iamais de luy seul, mais quand le sel ou le soulphre sont alterez & corrompus, ainsi comme dit est, ils engendrent des excremens veneneux, que la nature debilitee par excez ne peut expulser, & lors ce mercure les reçoit dedans soy, & en est infe-Eté, puis apres les portant par tout le corps il s'en descharge és parties concaues, ou il fait quelque seiour, comme aux iointures, ligamens, artoils, veines, arteres, & és os iusques aux moelles, dont s'ensuyuét grieues & douloureuses maladies, comme la verole, que ie nomme la premiere, d'autat que les nations luy ont donné le nom de mal François. En apres, toutes especes de calculs, ou pierres, grauelles & sablons tant és roignons & à la vescie, qu'en plusieurs autres parties du corps: & ce moyennant l'aide de l'esprit coagulatif qui procede du fel. fel. Pareillement toutes especes de gouttes tartareuses, comme sont podagres, gonagres, chiragres, schiatiques, & artethiques. Et lors que ce venin a prins telle possession esdites parties, il les priue de leurs esprits vitaux, qui se consument de peu à peu : de quoy aduient encores aridure des membres, refroidissement & congelation des ners, auec contraction de membres en diuerses parties du corps: toutes lesquelles maladies se nomment propremet mercurielles.

Voyla de quoy, & comment sont engen drees toutes les sortes de maladies, qui alterent la santé, & empeschent les hommes de paruenir au droit periode de seur vie, accelerans seur mort par faute de se bien gouverner, ou de se premunir des remedes que Dieu a mis en la nature tant pour la coservation, que aussi pour la restauration.

Maintenant si quelcun demande, pourquoy sont tels noms donnez à toutes maladies, à sauoir sulphurees, salees, & mercu riales, selon les distinctions dessus dites: ie respons, que c'est non seulement pour les cognoistre en leur vraye anathomie, auecques leur origine & cause, mais aussi pour

DISCOVES

donner entendre quels doyuent estre les remedes, & la nature des medicamens necessaires à leur guerison. En quoy faisant ie veux dire tout premieremet, que la com mune opinion ne me plait point en ce, qu'on dit toutes maladies se deuoir guerir par leur contraire. A sauoir les maladies chaudes par medicamens froids, & les froi des par les chauds, soit en tel outel degré comme lon voudra: ce qui ne me semble aucunement considerable: mais bien faut il sur toutes choses aduiser aux vertus spe cifiques des simples contre chacun mal, sans auoir esgard s'il est chaud ou froid, ny en quel degré de chaleur ou de froideur. Bien suis ie d'auis, & veux affirmer, que le bon medicin doit cognoistre non seulement la qualité, mais aush le degré de la maladie: à fin d'y ordonner le medicament propre, & qui soit en pareil degré de vertu & puissance pour vaincre, ou à tout le moins esgaler le mal, & esuertuer la nature offensee, laquelle par apres fera tresbien son deuoir à expusser son contraire: & taschera tousiours de se vigorer & conseruer sans nulle faute. Tels medicamens tat vertueux qui ne sont chauds ne froids, ains

ains temperez & amiables à la nature se trouuent és quintes essences bien dextrement tirees de chacun simple, soit animal, vegetal, ou mineral selon les vertus specisiques, que la nature a données à chacun

particulierement.

D'auantage, lon void chacun iour le suc ces infortuné de ceste façon commune de medicamenter les maladies chaudes par medicamens froids, & les froides par les chauds, estans l'vn & l'autre contraires à la nature humaine: de quoy toutesfois il ne se faut doner grand merueille: car au moyé de telle contrarieté qui est entre la maladie & la medecine, quand elle est prinse dans le corps, & que les deux se viennent ioindre au combat comme deux forts & puissans ennemis, il ne se peut faire autrement, que le corps n'en patisse grandemet: & de sorte que le plus souuent il ne peut soustenir vn si dur combat, & ne sait auquel se ioindre, luy estans tous les deux, à sauoir le mal & le medicament, contraires & du tout ennemis. Par ainsi la victoire demeure au mal le plus souuent. Et si bien quelque fois vn medicament l'obtiet con tre le mal, si est ce, qu'il laisse le corps tant

debile & extenué de ce combat, que de long temps apres il ne se peut r'auoir: com me l'experience iournaliere le nous demonstre.

Il semble donques estre le meilleur, & de beaucoup plus expedient, qu'on doyue administrer les medicamens à chacune espece de maladie par son semblable specifique ou approprié: come sont soulphres aux maladies sulphurees: sels aux maladies salees, & mercures aux maladies mercuriales. I'entens parler des soulphres, sels & mercures de nature extraits de leurs corps, & bien rectifiez par l'art spagirique: combien que les soulphre, sel & mercure vulgars estans preparez deuement y peuuent aussi seruir : car en ce faisant tels medicamens, qui sont contraires seulement ausdites maladies, & amiables aux corps humains pour la similitude & conuenance qu'ils ont auec les choses dont lesdits corps sont composez, n'ayans à combatre que le malseulement, & fauorisez du corps leur amy, se pourrront promettre plus facile & heureuse victoire contre le mal, lequel estant une fois chassé dehors, tels medicamens y demeureront vnis auec leurs fem

semblables soulphre, sel & mercure corpo rels, les ayant au preallable purgez de tous leurs excremens veneneux, & remis ensemble de bon accord. Et en ce faisant leur restitueront aussi leurs premieres vertus

& puissances naturelles.

La question est de trouver tels medicamens si parfaicts & excellens, pour faire les operations dessus dites. Sur quoy i'assir me hardiment, qu'ils se peuuent trouuer, & tirer auec industrie d'vn chacun corps, soit animal, vegetal ou mineral, puis qu'ain siest, qu'ils en sont tous composez selon nostre premiere maxime tres certaine & veritable: toutesfois plus prochainement des vns que des autres, & de plus grande efficace, & plus prompte operation des vns que non pas des autres, selon le degré de leur excellence: car il faut noter, que tant plus est vn corps de nature solide, fixe, & difficile à corrompre, d'autant plus il est de longue duree, & par ainsi plus parfait & excellent par dessus les autres, qui sont de moindre durce. La preuue de cecy est notoire à celuy, qui cognoit la nature, & les degrez differens d'entre les choses metalliques, & les animales & vegetales,

DISCOVRS

qui sont les moindres en solidité, fixation & duree, consequemment aussi en vertus

& puissances.

Par là se peut entendre l'excellence de ce tresnoble & tresprecieux metal Roy de tous les autres, qui est l'or en sa pureté, sils du soleil, composé en sa premiere matiere de soulphre, mercure, & sel purs & nets, si bien vny en ses parties, & si sixe, qu'il ne craint le seu ne l'eau, ny autre ennemy qui le puisse destruire, ou luy coupper le cours de sa duree tant que ce monde pourra durer: & estant si temperé, qu'à bon droit on le peut appeller vn chef d'œu ure le plus excellent de toute la nature, qui est sous le sirmament.

L'on ne sauroit donques mieux choisir, que de ce tant precieux metal solaire pour en tirer les medicamens proptes & tres puissans, non seulement à conseruer la per sonne en tresparsaite santé, & longue vie, mais aussi pour la restaurer quand elle est alterce de maladies par diuers accidens, comme i'ay deduit cy dessus. Ce que tresbien ont cogneu les sages non seulement du premier siecle, qui ont conserué leurs vies en bonne santé par plusieurs centai-

nes

nes, & iusques à vn millier d'ans, mais encores plusieurs de ceux qui ont vescu depuis le deluge, comme Hermes le grand appellé trismegiste, c'est à dire trois fois sa ge, pource qu'il a eu tout le premier en ce monde renouuellé vraye cognoissance de toute la nature animale, vegetale & minerale: Pytagoras, Socrate, Platon, Aristote entre les plus excellens philosophes de leur temps: Salomon Roy des Hebrieux: Calid. Roy des Egyptiens, & Geber Roy des Arabes: Morien Romain: Albat le grad Euesque de Ratisponne, auec plusieurs autres anciens sages, & entre les modernes qui ont vescu depuis cet ou six vingts ans, Raimond Lule maioricain: maistre Arnaud de ville neufue tresexcellent medicin Napolitain: sainct Thomas d'Aquin, Roger Bacon, & George Ripla tous trois religieux Anglois: Bernard Comte de Tre ues:Hulderic Eslinger Cheualier Allemá, qui en a conserué la fanté plus de cent ans à l'Empereur Phederic pere de Maximilian: & pour le dernier ce grand Philosophe Theophraste Paracelse Heluctien, lequel a merité d'estre colloqué au premier rang, come estant vray Monarque de tou-

TO CO

te philosophie & medecine, tant en vraye theorique, qu'en bonne practique, & expe riences tres certaines, ayant guery de son temps toutes les maladies, que les medecins academiques estiment encores pour le iourd'huy estre incurables, comme ladrerie, mal caduc, ydropisie, toutes sortes de gouttes, podagres, & autres deplorees maladies: de quoy font ample foy les Seigneurs de Nuramberg, à la requisitio desquels il y guerist douze ladres à luy presen tez publiquement, lors que les medicins de ladite ville par enuie le voulurent faire chasser. Et pareillement les Seigneurs de Salisbourg, qui luy firent dresser vn epitaphe apres sa mort escrit & engraué en vne pierre contre le mur de l'eglise S. Sebastië, duquel i'ay bié icy voulu inserer la teneur pour rafraichir la memoire de ce grand & vertueux personnage.

Conditur hic Philippus Theophrastus insignis medicina doctor: qui dira illa vulnera, lepram, podagram, hydropisim, aliag, insanabilia corporis contagia minisca arte sustulit: ac bona sua in pauperes distribuenda collocandag, ordinauit. Anno M. D. X L I. Die xxiiÿ. Septembris vitam cum

morte commutauit.

Mais

Mais reuenant à nostre propos touchat les excellentes vertus de l'or, ie ne veux pas nier, que les autres metaux ne soyent aussi douez de vertus admirables tat pour la conseruation, que pour la restauration: sachant tresbien qu'vn chacun ha sa vertu specifique pour seruir aux sept principaux membres interieurs du corps humain:à sauoir l'or au cœur, l'argent au cerueau, le mercure au fove, l'estain au poulmon, le plomb à la rate, le cuyure aux roignons, & le fer au fiel. Non moindre vertuse trouue en plusieurs autres mineraux, comme sont toutes sortes de marchasites, sels, vitriol, foulphre. Plusieurs pierres precieuses, com me sont rubins, esmeraudes, saphirs & autres approchent aussi de ces vertus: comme font les perles, corail, manne celeste, ensemble plusieurs animaux & vegetaux, sans oublier le precieux antimoine, lequel encore qu'il soit compris sous le genre des marchasies, ce neatmoins il merite d'estre commemoré particulieremet à cause que nature l'a doué de tant d'excelletes & admirables vertus, que peu s'en faut qu'il ne merite d'estre tenu au rang de l'or, pour le regard de la medecine, estant preparé ainsi

Die

46

qu'il appartient: car alors sa pure essence ha vertu & pouuoir de sa predestination ou proprieté naturelle pour assiner l'or de l'homme, qui est le cœur, en separant & deschassant arriere de luy toutes impuritez, ne plus ne moins que nous voyons par ce mesme antimoine assiner l'or mineral en separant de son essence toutes impures messanges qu'il tenoit des autres metaux imparfaits. Toutes sois ie dis, qu'en l'or seul est la medicine vniuer selle pour seruir à tout ce, que les autres metaux & mineraux, ensemble les animaux & vegetaux sont appropriez chacun particulierement, & de sa vertu specifique.

Les anciens Philosophes, qu'on appelle Poetes, ont tresbien cogneu cecy, quand ils ont escrit Apollo estre le dieu de la medecine, c'est à dire le secours des malades, & la medicine mesme pour guerir les humains de toutes leurs maladies. Ont aussi tenu son sils Esculapius pour le premier & plus excellent medicin du mode. Ce mesme dieu Apollo est encore appellé Phœbus, & le clair soleil illuminat tout ce grad monde. Or ie demande, qu'est ce qu'ils nous ont voulu signifier sous leurs sigures

poetig

poetiques, sinon que l'or (qui est Apollo, & clair Phœbus) contient en soy la medicine vniuerselle pour guerir de toutes maladies, & illuminer tout le dedans du petit monde, qui est le corps humain? Et par Esculapius son fils nous ont signifié le bon medicin, qui sait preparer cest or de telle façon, qu'il se puisse communiquer & incorporer auec ledit corps humain, à sin de l'illuminer par ses clairs rayons, & produire en iceluy ses esse stat vertueux, salutai res & seçourables contre toutes maladies.

A ce propos les Philosophes sont encores d'accord, qu'il n'y a rié en la terre d'engendré, qui n'ait son pere geniteur au ciel, comme il soit ainsi, que Dieu le createur de tout aye premieremét creé le ciel, auec tout son bel exercite des astres & planetes, produisans leurs influances sur tous les corps terrestres selon & ainsi qu'il a pleu à la diuine maiesté l'ordonner: parquoy nous disons, que l'or estant la chose plus parfaite qui se trouue entre tous les corps insensibles de la terre, est le vray & legitime fils engendré du soleil celeste, lequel est aussi la plus parfaite creature du ciel.

Touchant aux corps humains, il est ap-

他

Dit.

(a)

(22)

Dis.

ALC:

(元)

Mich

地山

prouué de tous, sans contredit, que les Astres & l'homme engendrent l'homme: à raison de quoy cest homme, sans nulle dou te, est subiect aux influaces des astres bonnes ou mauuaises, le considerant comme vn corps phisique tant seulement. Ce que ie dis pour cause, à fin que aucun ne s'excuse de son peché reiettant la coulpe sur son Astre, s'il est larron, meurtrier, auaricieux, paillard, ou de quelque autre vice entaché: car il est escrit, que l'homme sage aura domination sur les astres, pour ne se rendre subiect à leurs malignes influances. l'entens par l'homme sage celuy qui est regeneré par l'esprit de Dieu en nouuelle vie gardant ses commandemens, auec parfaite foy, & confiance de paruenir à la vie eternelle sous l'enseigne de lesus Christ nostre Seigneur & capitaine.

Donques considerant l'homme comme vn corps phisique engendré en partie des astres, ce n'est pas sans cause, qu'il est appellé mycrocosme, ou petit monde, contenant en soy par similitude tout ce qui est contenu au grand monde: mesme les sept planetes, qui sont les sept principaux mem bres interieurs: à sauoir le cœur, le cerueau,

le foye,

le foye, le poulmon, la rate, les roignons, &z le fiel: lesquels ont la domination sur tout le corps en ce petit monde: tout ainsi com me les sept planetes Sol, Lune, Mercure, Iu piter, Saturne, Venus, & Mars ont la domination sur toutes les creatures du grand monde.

Ces sept planetes celestes ont aussi laissé leurs noms come par vn droit d'heritage aux sept metaux de la terre leurs vrais & legitimes enfans: c'est à sauoir le Soleil à l'or: la Lune à l'argent: Mercure à l'argent vif: Iupiter à l'estain: Saturne au plomb: Ve nus au cuyure: & Mars au fer: & auecques les noms y ont imprimé leurs vertus & puissances,

De ces choses nous apprenons premierement à cognoistre les maladies metalliques, auec leur origine, quand aucun des membres interieurs de l'homme est malade: & secondement dont il faut tirer leurs medicamens specifiques plus prochainement, & de plus grande vertu: qui est sans nulle doute des sept metaux dessusdits, & d'vn chacun d'iceux estant approprié à sa maladie: comme au mal du cœur il faut prendre la medecine de l'or: aux maladies

200

Doz

DISCOVRS

du cerueau la medecine de l'argent: à celles du foye la medecine de l'argent vif: à celles du polmon la medecine de l'estain: à celles de la rate la medecine du plomb:à celles des roignos la medicine du cuyure: & à celles du fiel la medecine du fer. Toutesfois attendu que l'or est le seul parfait contenant en soy les vertus de tous les autres, c'est à luy seul auquel on peut seurement recourir, pour trouuer plus prompt & vertueux secours contre toutes lesdites maladies. Et voylà à quelle fin principalement Dieu a creé & donné aux humains ce tresnoble & precieux metail: & no pour seruir à leur auarice par vsures & rapines, ny à l'orgueil & vaine gloire par trop curieux paremens de leurs personnes.

Or est la difficulté en la preparation de cest or pour en tirer la medicine vniuer-selle tant vertueuse. Car ceux la errent grandement, qui auecques toute sa masse corporelle ainsi qu'il est, le font bouillir en leurs potages ou bruuages : parce qu'ils n'en peuuent tirer aucune substance, est at son corps de nature si compacte & sixe, que le feu mesme pour violent qu'il soit, ne le peut d'iminuer, ou luy substraire au-

cune chose de ce qu'il a receu du benefice de nature: moins donques le peuuenț faire toutes les eaux, ny autres choses auec lesquelles on le fait bouillir ou tremper. Et quant à ceux qui l'administrent en poudre, limaille, & fueilles subtiles és restaurens, pilules & cerops, comme est leur tant estimee confection d'alkermes, ils errent doublement, ne pensans point à ce, que la chaleur naturelle de l'homme est moins que suffisante pour le digerer : car elle ne sauroit corrompre ce que le seu externe ne peut aucunement destruire: tellement que cest or ainsi pris en poudre, ou en fueil le ne se pouuant communiquer au corps humain est expussé dehors, & se trouve dans la chaire percee tout tel, qu'il a esté pris par la bouche, sans aucune diminutio de son poids ne de sa substance, & par con sequent n'y profite de rien: mais au contraire, si la faculté expultrice de l'homme se trouue debile, cest or ainsi aualé demeure amoncelé dans l'estomac, qui en est grandement chargé & agraué. Ou bien, au cas que la nature se trouue si gaillarde, qu'elle en puisse faire, ie ne dy pas resolution, mais seulement quelque assubtilia-

tight.

his

200

The

品

DISCOVRS

moins que suffisante pour le rendre communicable au cœur & au sang: par ainsi il s'en va tousiours auec les excremens: & que pis est, en passant par les boyaux il les incruste & dore par dedans: au moyen de quoy sont estouppez les pores, & empeschees les sunctions naturelles tant de l'esto mac, que desdits boyaux: dequoy certes naissent plus de maladies, que n'ont iamais pensé tous ceux qui l'administret, ny ceux qui le prennent ainsi grossierement.

Il faut donc par necessité, que ledit or soit preparé & assubtilié d'une autre sorte, à sauoir est par reduction en sa premiere matiere: qui est mercure, soulphre & sel, de telle façon, qu'estant pris par la bouche il se puisse facilement, & sans donner aucun trauail à l'estomac, communiquer, vnir & incorporer auec les semblables mer cure, soulphre & sel de l'homme: qui sont la vraye matiere de sa composition, ainsi comme de tous autres corps sensibles & insensibles.

Toutesfois il se faut bien garder, qu'en ceste preparation n'entre le venin d'aucun corrosif, lequel pourroit auancer plustost

que prolonger les iours de l'homme: ains se faut aider seulement de choses cordiales, & amiables à la nature. Ce que nous auons trouué par vne grace speciale de Dieu és esprits d'aucuns animaux & vege taux, qui sont les plus familiers à la nature de l'homme:comme sont ceux qu'on peut extraire par l'art chimique du plant de Ianus, & de la manne des fleurs (secret admi rable de la nature) par le moyen desquels si excellens esprits nous auos r'amené cest or(autrement reputé indomtable) à sa premiere matiere de mercure, soulphre & sel distincts & separez, visibles & palpables. En quoy faisant auons aussi trouué les trois manieres d'or potable iouxte ce, que le dessus nommé Paracelse nous a laissé par escrit en son liure de la cure & guerison des membres contraicts, auec peu de paroles: mais en grands misteres, lesquels il n'est possible de comprendre sinon auec les experiences.

Il dit donques, qu'on appelle l'or potable, quand auec autres esprits & liqueurs il est reduit en substance qui se peut boire: & que la dose d'iceluy est d'vn scrupule

par chacune fois.

C 3

事物

性色

世中

La seconde maniere est, quand apres ses dissoluens separez il est reduit en forme d'huyle aureux en sa seule substance sans addition de chose quelcoque: & de cestuy la dose ne doit pas exceder le poix de dix grains d'orge pour le plus.

La troisseme est appellee quinte essence de l'or, quand sa taincture rouge en est extraite, & separce de son corps: en laquelle taincture il dit consister la principale vertu & vigueur actiue d'iceluy: parquoy n'en ordonne la dose, que de trois grains seule-

ment à la fois.

Il y en a vne autre & quatrieme maniere beaucoup plus excellente, que toutes ces trois, de laquelle il ne parle point audit liure des contractures, mais bien en plusieurs de ses autres liures: nommément en son liure de Tinctura Phisicorum, en sa Py rophilie, au liure De spiritibus planetaru, és second & tiers liures De vita longa: de laquelle quatrieme maniere vn seul petit grain peut faire transmutation soudaine, non seulement des metaux imparfaicts, mais aussi des corps humains alterez de quelque maladie que ce soit, en purgeant l'vn & l'autre de toutes leurs ordures & impu

impuritez. Celuy qui la pourra trouuer se peut bien asseurer de la faueur & grace de Dieu, lequel ne la donne en tous temps, ne à tous ceux qui la cherchent: mais seulement à qui, & quand il luy plait: à fin d'en vser bien & sagement à son honneur, & au

profit du prochain en vraye charité.

Touchant à ce, que Paracelse en sondie liure des contractures ordonne prendre cest Orpotable selon lesdites doses trois fois par iour: au matin, à midy & au soir: il entéd pour ceux qui sont malades, & mesmement pour la guerison desdites contra-Aures: non point pour les personnes saines qui se veulent seulement conseruer: & pre munir contre les mauuais accidens à venir: car à ceux là suffira bien d'en prendre seulement vne fois le iour au matin, ia soit qu'ils fussent desia bien auancez sur l'aage: & aux plus ieunes vne seule fois en la sepmaine: ou au mois qui voudra tédre à l'espargne: combien qu'il ne sauroit faire que tresgrand profit à celuy, qui a le moyé d'en vser tous les jours: & cela sans aucune distinction de temps, ny des personnes pour cause des sexes, aages & coplexions: quelque difference qu'il y puisse auoir de l'vn

à l'autre:par les raisons qu'on peut colliger des tesmoignages approuuez, que ie veux bien icy amener en declarant plus à plain les trespuissantes vertus & proprietez de

ce benoist or potable.

Entre les plus excellens Philosophes anciens Geber Roy d'Arabie traittant de l'excellence de l'or a escrit, iceluy estre vne medicine letifiante, & conservant le corps humain en vne logue & vigoreuse ieunesse.La raison y est bien naturelle: parce que toute chose s'essouyst auec son semblable. Or est il, que l'or estant le vray fils dusoleil qui esclaire tout ce grand monde, ne recognoit pour son semblable rien qui soit, tant comme le cœur humain, qui est nostre soleil interieur, & entre les sept principaux membres du microcosme le plus excellet, tout ainsi qu'est le soleil entre les sept planetes de ce grand monde. Aussi lon voit comme cest or excellent de sa proprieté naturelle attire le cœur de chacun qui le void, & le desire, iusques aux petis enfans non ayans encore cognoissance ny l'vsage de raison. Et me souuient d'en auoir veu aucuns estans encore à la mammelle, qui sauoyent tresbien discerner & choisir vne piece

piece d'or entre plusieurs iettons de laton neufs, & reluisans comme l'or mesme. Parquoy ne se faut pas esmerueiller de ce, que l'or naturellement se retire droit au cœur de l'homme pour le resiouyr comme son semblable, & en le ressouyssant chasser arriere de luy toute tristesse: laquelle obnubile l'air de nostre corps, tout ainsi comme l'air de ce grand monde est souuentesfois obnubilé des noires nuees, & vapeurs sortans de la terre melancolique, lesquelles nous empeschent la lumineuse & plaisante irradiation du grand soleil celeste. Et par consequent apres la tristesse chassee,& l'allegresse introduite au cœur de l'home, qui la communique à tous les autres mem bres interieurs, tout ainsi comme le grand soleil communique sa clarté à tous les autres planetes du ciel, il s'ensuit bien, que ceste ioye s'esgayant par tout le corps de l'homme, iusques en l'exterieur (ainsi qu'il se cognoit à la face de chacun) ne peut faillir, qu'il ne represente la personne plus belle, plus ieune, & de tous poincts mieux disposee, qu'elle ne seroit sans vne telle allegresse: Et par ainsi empesche, ou pour le moins retarde par vn long temps la venue

公田田本

DISCOVRS

de ceste ridee & dissorme vieillesse.

Maistre Arnauld de Villeneufue aussi grand philosophe & medicin tres excellent de son temps, en son liure De conferuanda iuuentute, & retardanda senectute, apres auoir au premier chapitre extollé sur toutes les choses de ce monde l'or bien preparé, puis apres au second il dit ainsi: Et est à sauoir, que la renouation & confortation de la peau de l'homme se fait par vser d'or potable proprement: car c'est celuy, qui guerit toutes lepres, transmue le corps humain, le purifie & renouuelle. Il y a plusieurs autres choses dont la vertu approche ceste operation: mais c'est ledit or potable, qui fait ces miracles sans se corrompre: & qui est conuenant à la complexion humaine: car il n'eschauffe ny refroidit: il ne humecte ny desseche: mais est temperé de tout temperament, & excedant toute autre chose en la temperance & peremnité qu'il ha. Aussi il done secours à l'estomac froid:faithardis les timides:coforte les car diaques, vaut contre la melancolie, confor te & tépere la chaleur naturelle: esquelles choses n'y arien qui puisse tenir son lieu: Sa vertu est manifeste en sa substance. Er parce

parce qu'il y a en luy clarté, il clarifie: parce aussi qu'il y a grande temperance, il fait vn grand temperamet sur toute chose: & d'au tant qu'en luy a grande peremnité, il conserue le corps humain: parce aussi qu'il y a semblance à la complexion humaine, il se incorpore estant preparé comme il appartient:mais en sa preparation gist tout le secret, qui a esté caché des sages pour crainte de l'enuie. Outreplus il confirme & re-Aisse la substance du cœur: & par l'impression de sa purité deschasse de luy toute im purité, & le garentit: il clarifie la substance des esprits: & esmeut le sang iusques à la peau, induisant vne beauté iuuenile: & nettoye fort doucement. Plus au tiers chapitre du mesme liure est ainsi escrit: Et quant aux autres choses lesquelles d'vn seul egal temperament eschauffent & humectent, il y a le vin, qui est de complexió temperee. La perle pareillemet est temperee, temperant & confortant la chaleur naturelle: elle profite aux cardiaques, & aux timides: & clarifie proprement le sang du cœur: auquel i'en ay veu aucunes se liquesier: & d'icelles ont esté gueries plusieurs maladies: mais ce qui n'a point de

136

の一年

die

wil.

25

CT


pareil, est le sel de la miniere du soleil: lequel estant preparé, les sages l'ont acomparagé à la chaleur d'vne saine adolescence: & pour telle similitude en ont vsé, l'appellant pierre animale. Les autres l'ont appellé chissir mineral: & aucuns la medicine perpetuelle, & l'eau de vie. Et toute l'industrie de sa preparation est, qu'il soit reduit en eau trespure & potable auec choses, qui ne puissent estranger sa naturelle proprieté. Voylà les propres paroles de ce grad medicin de Villeneusue traduites sidelement de son Latin en nostre François.

Qui voudra plus particulierement sauoir les vertus infinies de ceste precieuse liqueur & substance de l'or, qu'il lise les liures des bons autheurs anciens & modernes: & par dessustous, ceux de ce grand monarque de toute philosophie & medicine Theophraste Paracelse, qui en a gueri mille & mille personnes de toutes maladies les plus desesperces qu'on puisse nomer: & duquel ie confesse ingenuement auoir aprins le plus de ce que ie say en la philosophie & medecine: m'estant du tout & dés long temps adonné à la lecture de ses siures: parce que i'ay trouué sa theori-

que

que en tout & par tout si bien fondee sur la raison, & sur la lumiere de nature, iointes plusieurs belles experiences que i'en ay faites, & veu faire à certains excellens personnages ensuyuans sa practique, qu'il m'a esté force d'y adherer: sans toutes fois deroger à l'honneur & authorité de ces autres grands & sauans docteurs qui sont leus & enseignez és academies: comme Hipocras, Dioscoride, Galen, Auicenne, Mesué, Rasis & autres, lesquels i'ay aussi pour la plus grand part leus & releus assez attentiuement: & sur le tout faisant vne resolution me suis persuadé, qu'estant la vraye medicine premierement deriuee du ciel, Dieu la donne cognoistre non pas à tous ceux, qui portent le nom & tiltre de medicin, mais seulement à qui luy plait:& benist les labeurs de celuy, qui la veut exer cer au salut de son prochain en vraye charité: & non pour l'ambition, ou pour l'auarice. Au Roy des Roys, immortel, inuisible, & vn seul Dieu soit honneur & gloire à tous iamais. Amen.

FIN.





A TRESILLU-STREET TRESEXCELlent Prince Monseigneur Iaques de Sauoye, Duc de Nemours & de Geneuois salut, auec tout accroissement d'honneur & de grandeur.



ONSEIGNEVR, ayant ces iours passez employé le temps à composer vn bref discours, sur les excellen tes & admirables ver tus de l'Or potable, auquel i'ay traicté par

occasion les principaux fondemens de la medecine, l'origine de toutes maladies, & dont il faut prendre les medicamens plus propres à leur guerison: auec vne epistre dedicatoire au Roy nostre Sire, ie n'ay pou

retenir l'ardeur de ma plume, qu'elle n'ait quant & quant voulu trasser vn autre petit traicté intitulé, Apologie de la noble & tres vtile science d'Alchimie, tant contre ceux qui la blament ou contemnent, que aussi contre les faussaires, trompeurs & lar rons qui en abusent. Le subiect que i'ay prins en l'vn & l'autre traicté, me semble fi gentil, & auec cela d'vne si grande importance, qu'il meriteroit bien d'estre mieux dilaté: & reuestu d'autres fleurs plus belles, qu'elles n'ont peu croistre pour encores dans mon iardin. Toutesfois n'ayant veu ny entendu, qu'aucun autre de nostre téps se soit auance pour en escrire: & m'estant persuadé, qu'il estoit grand besoin dés maintenant sans plus attendre, de faire co gnoistre aux bons & vertueux la piperie & tromperie des malins, & prophanateurs des choses sainctes, ie n'ay voulu tenir caché plus long temps ce petit talent, qu'il a pleu au Souuerain Dieu me despartir de sa benigne grace: estant mon intétion prin cipale en tous mes escrits, d'aider à remettre sus la vraye medicine en son antique splendeur: d'autant qu'elle nous a esté premierement donnée du ciel, tant pour la conser

conseruation, que aussi pour la restauration de nostre santé. Il est bien vray, que ce n'a pas esté ma profession principale par cy deuant: mais ie ne puis nier, que dés ma ieunesse ie ne l'aye toussours aimee: & recherché curieusement tous les meilleurs liures, pour y estudier en ma solitude: & auec cela tasché par tous moyens honnestes d'accoster les plus sauans personnages, que i'ay peu cognoistre, pour communiquer familierement auec eux, tant de ceste medicine, que des autres parties de la philosophie: à fin d'aprendre tousiours quelque chose d'eux: ou de cossirmer mon iugement sur ce, que i'auois aprins par la lecture des liures. le n'ay aussi espargné pei ne ny despense, pour faire plusieurs & diuerses experiences manuelles: & combien que souuétes sois ie m'y soye failli en main tes choses (non toutesfois au fraiz, ne au dommage d'autruy) si est ce que ie n'ay pas occasion de m'en repentir: parce que mes erreurs recogneues m'ont plus aprins, que tous les liures: & m'ont ouvert le pas en ceste lice, ou i'ay donné carriere à mon esprie pour attaindre iusques au bout, moyennant l'aide & faueur de Dieu, du-

电级

那份

Pie

EPISTRE

quel seul prouient tout don bon & parfait. Or Monseigneur, d'autant qu'il vous a pleu quelquefois de communiquer aucç moy sur aucunes particularitez de ceste science d'Alchimie: laquelle vous aimez, comme toutes autres choses gentiles & vertueuses, sans vous arrester au jugement du vulgue ignorant, qui la mesprise, tout ainsi comme le pourceau contemne les belles & precieuses margarites, i'ay pensé que vostre excellence ne prendroit en desdain ce petit present, que ie luy fais de mon Apologie dessusdite, qui ensuit immediatement mon discours de l'Orpotable. Et ce pour tesmoignage de la bonne volonté, que i'ay de vous faire autre meilleur, & plus vtile seruice à l'endroit, que vostre excellence, me iugera estre idoine, & digne de receuoir vos commandemens. A Lyon ce 15. de Ianuier 1575.

> De vostre excellence le tres humble & tres obeissant seruiteur Alexandre de la Tourrete.

the text of the text of the text the text the

of my amorally promined - questioned

APO



APOLOGIE DE LA

NOBLE ET TRESVTILE

Science d'Alchimie, tant contre ceux qui la blasment & contemnent, que ausi contre les faulsaires, larrons, & trompeurs qui en abusent: composee par le Sieur de la Tourrete, n'agueres President en la cour des Generaux des monnoyes de France.



'Est tousiours le propre des ignorans non seulement de contemner, mais encore de blasmer ouuertemet les choses, qu'ils ne sauent. Et le plus

grand malheur est, quand les hommes reputez doctes adherent au jugement du
vulgue coustumierement faux & temeraire: sans vouloir prendre la peine d'examiner les choses de plus pres, à sin de pouvoir
discerner le bon du mauuais, & la verité
d'auec la mensonge: à quoy faire tous les
bons & vertueux esprits se doyuent continuellemet exercer. La noble science d'Al-

chimie sert en cecy de bon exemple : car la soit qu'entre routes les sciences iadis inuentees, & qui sont en vsage pour le bie & seruice de l'homme, il n'en y ait pas vne, țant vtile, comme est celle de l'Alchimie, ce neantmoins chacun la blasme, & s'en mocque comme de la plus grande folie du monde. Et moy au contraire la tenant pour vne science diuine croy fermement, que c'est l'vn des plus grands benefices apres l'immortalité de l'ame, que Dieu ait conferé aux humains: car par le moyen de ceste science (qui ne marche point sans la compagnie de ma treshonnorce dame Phi losophie) nous pouuons cognoistre les admirables vertus, que Dieu a mises en tous les corps sensibles & insensibles de la terre, animaux, vegetaux & mineraux: de quov ils peuuent seruir à l'homme tant pour la conseruation, que aussi pour la restauration de sa santé: le propre lieu auquel ces vertus sont encloses en chacun corps: & les moyens de les en tirer, pour les auoir en leurs essences pures & nettes:à celle finque leurs actions & operations ne puissent estre empeschees par le phlegme & la terre, entre lesquels ces vertus sont encloses: comme

comme dans vne prison obscure: tellemet qu'auec iuste raison l'on pourroit reputer totalement indigne du nom & tiltre de medicin celuy, qui n'a l'entiere & parfaite cognoissance de ceste noble science d'Alchimie, pour seruir aux essets dessusdits.

Aucuns l'appellent art chimique, les autres spagirique: & les operateurs d'icelle spagires: nom inuenté par Theophraste Paracelse, qui a esté le plus excellent spagire, ou alchimiste, qui sut onques depuis Hermes trismegiste iusques à nostre téps: ainsi que ses liures nouuellement trouuez & mis en lumiere le demonstrent. Quant à moy, ie suis content de nommer ceste science du nom plus commun à tout le monde, à sauoir alchimie: & pour faire entendre aux ignorans quelle beste c'est, ie commenceray par sa dissinition.

Alchimie donques est vne science, qui renseigne de separer les elemens de chacun compost produit par la nature: & de les recueillir dextrement chacun en son propre vaisseau. Autrement, Alchimie est vn art, qui monstre les moyens de separer le subtil du gros, le pur de l'impur: & de tirer d'yn chacun compost naturel son es-

APOLOGIE

sence pure & nette, en laquelle gist toute la vertu de ce compost. Ou bien se peut definir ainsi: Alchimie est vne science, par laquelle nous aprenons à cognoistre la pre miere matiere de tous les corps du monde, soyet animaux, vegetaux ou mineraux: & commet la nature a procedé en les procreant & perfectionnat iusques à leur derniere matiere: & aussi comment il faut que nous procedions pour les desfaire en retro gradant l'ordre d'icelle nature, si nous vou lons voir oculairement leur premiere matiere: en quoy faisant nous trouuons veritablement, que c'est de trois choies sans plus ny moins: à fauoir, soulphre, mercure, & sel visibles & palpables chacun en son essence corporee, apres qu'ils sont separez du compost par le moyen de ceste science.

O que ces trois belles diffinitions tendans toutes à vn seul but deuroyent bien suffire à tous les doctes & plus excellens esprits, qui n'ont iamais ouy parler, ny veu les liures de ceste science, pour les esmouuoir à l'aimer & honnorer, s'ils veulent pen ser vn peu prosondement à la consequence, & au grand prosit & vtilité, qu'ils en pourroyét bien rapporter en la practiquat. Les operations de ceste science sont multiples: & disserentes les vnes des autres: & neantmoins toutes ensemble tendans à vn mesme but, & au poinct de sa dissinition: les quelles ie reduis & comprés au nombre de sept: à sauoir calcination, pu trefaction, dissolution, distillation, coagualation, sublimation, & sixation.

Le principal instrument de toutes ces operations est le feu, qui est aussi multiple, & de diuers degrez : lesquels ie reduis pareillement en quatre principaux: dont le premier est le feu du fumier, ou du baing marie, conuenable aux putrefactions, & dissolutions:comme aussi aux distillations des liqueurs mercuriales. Le second est le feu de cendres plus chaud que le premier, conuenable aux coagulaciós:comme aussi aux distillatios d'aucunes liqueurs grasses & huileuses. Le tiers est le feu du sable encores plus chaud que le second: & conuenable aux sublimations, & fixations, comme aussi aux distillations d'aucunes liqueurs plus tenaces, & adherantes auec les autres parties du compost: ainsi que sont les mineraux, specialement les metalliques. Et le quart est le feu de flabe auec-A Blowy

R/a

聖旨

Stine .

Dit

建宁.

ques bois propre, ou de charbon vif calidissime, sur lequel estant mis le vaisseau se font les reuerberations, calcinations, & in-

cinerations de chacun compost.

Et faut entendre, qu'vn chacun de ces quatre feux se doit reduire par autres degrez successifs selon l'exigence du copost, & de la chose que nous en voulons retirer: comme le feu du baing marie a trois degrez. Le premier est, quand le vaisseau contenant le compost est exposé sur la fumiere de l'eau eschauffee: le second, quad ledit vaisseau est plongé dans ledit baing d'eau chaude sans bouillir: & le troisieme, quand auec plus grad feu l'on fait bouillir l'eau dudit bain. Ainsi se peuuent graduer les autres trois feux: à sauoir de la cendre, du sable, & du charbon: tant par les souspiraux & registres des fourneaux dextrement faicts, que aussi par la quantité du charbon, & du bois qu'on met dedans par iustes mesures: ou par le nombre des mesches en faisant feux de lampe selon l'exigence du compost, que l'on veut traiter.

Celuy qui entendra bien tous ces feux externes, & auec ce n'ignorera point le feu de nature tel qu'il est en l'interieur du com

post,

post, & comment l'un peut exciter, vigorer, & adresser l'autre, meritera vrayement le nom de philosophe: & pourra mener à bonne sin les plus excellentes choses du monde.

Or pour entendre plus particulieremet les dites operations d'alchimie, ie viens à la premiere, qui est calcination: d'autat qu'il faut commencer par là, qui veut faire bonne separation des parties en tous les composts solides & fixes, comme sont les metalliques: & dis que la calcination a esté trouuee pour deux causes: la premiere est, à fin de priuer le compost de son humidité accidentale, ou phlegme superflu, & le disposer aux autres operations:mesmemet de solution: apres laquelle (& non autrement)se peut faire la separation des parties elementaires dudit compost. La seconde cause est pour oster & cosumer le soulphre combustible impur & corrompant, qui est audit compost, non estant encores amené à sa perfection par la nature.

Cecy pourroit sembler estrange à plusieurs, qui n'ont cognoissance de l'art: quad ie dis, qu'il faut calciner les corps solides & fixes, & en ce faisant les despouiller de

D 5

leur humeur accidentale pour les disposer à solution: car au contraire (diront ils) cest humeur deuroit estre cause & moyen de ladite solution: & partat il vaudroit mieux de le conseruer. Mais pour les esclaircir de ce doute, ie dis auec tous nos maistres en philosophie, qu'il y a deux humiditez en chacun corps: l'vne est accidentale, laquel le nous reiettons comme phlegme inutile! & l'autre interne & radicale contenant en soy l'esprit de vie, & donnant audit corps sa forme & essence : laquelle humidité seconde iamais ne se separe par la calcination du corps, tant est leur vnio forte: mais bien fait ouurir les pores dudit corps pour receuoir vne autre humidité externe, qui sera propre à faire ladite solution selon l'in telligéce du bon operateur. Vray est, qu'apres icelle solution faite l'on peut encore priuer cè corps de son humeur radical par l'ouurage de separation des elemens: en telle faço, que ledit corps demeurera puis apres comme cendre, ou terre morte: ce que nous appellons proprement l'ouurage de incineration. Et partant il faut bien icy noter la difference, qui est fort grande entre calcination & incineration: car à la cas-

cina

cination le compost ne perd aucune chose de la forme, comme nous auons ia dit: de façon qu'il peut toussours estre reduit en son corps continué: voire plus pur qu'il n'estoit au parauant: mais à l'incineration le compost est entierement destruit, & priué de sa forme, ayant perdu son humeur radicale, ou liqueur mercuriale, qui estoit cause de sa continuité, & conservation de fadite forme: tellement qu'apres ceste incineration il ne peut iamais plus estre reduit en corps, ainsi comme il estoit au parauant. Plusieurs operateurs se sont faillis pour n'auoir entendu ceste difference, qui est de fort grande importance, & bien remarquable.

La seconde operation, qui est putresaction, la principale clef de toute la science, nous a esté enseignee par la nature : car ia soit, que tout son desir, trauail & diligence ne soit, qu'à conseruer routes ses especes par nouvelles generations & multiplications, toutes sois elle ne peut rien faire sans la putrésaction precedente. Ce que pareillement nous est enseigné par ce grand phi losophe les Christ nostre sauveur disant, que si le grain de froment ietté sur la terre vient à mourir & se pourrir, adonc (& non autrement) il apportera fruict à foison. Par ainsi tous bons alchimistes se doyuét bien trauailler apres ceste putrefaction sur toutes choses, & premier que de proceder plus auant en leurs entreprises de quelque chose que ce soit : autrement iamais ne feront bonne separation des parties elementales de leur compost: & par consequét ne trouteront la vertu d'iceluy : moins encore le rendront apte à faire generation nouuelle, ou multiplication soit en quantité, ou

qu'ils le puissent traicter.

La troisieme operation, qui est dissolution, ensuit la precedente: & se fait en deux sortes diametralement contrairés. L'une au chaud, & l'autre au froid: chacune d'icelles neantmoins estant accompaignee d'humidité externe. La dissolution par chaud & humide se fait au baing marie, ou au sumier, comme nous auons deduit cy dessus. Et celle qui est par froid & humi de, se fait dans les puys, ou sontaines, & das les caues, ou autres lieux sousterrains, selon l'exigence de chacun compost.

en vertu, par quelconque autre moyen

La quatrieme operation, qui est distillation,

tion, se fait pareillement en deux sortes contraires. Quant à celle qui se fait au chaud, nous en auos ia dit à suffire parlant des degrez du feu externe. Et quant à l'autre qui se fait au froid, c'est à dire sans feu, la maniere de faire l'hypocras distillat par vne chausse de drap, est notoire à chacun. mais il y a vne autre mode plus subtile &. meilleure, qui est, en mettant pieces de drap coupé en forme de langues par vn: bout dans le vaisseau, qui contient la solution: & l'autre bout pendant au vaisseau preparé pour receuoir la distillation, laquelle est appellee filtration: & se doitreiterer iusques à ce qu'on aye sa liqueur bié claire, pure, & nettoyee de toutes feces & ordures : qui est la cause principale pourquoy l'on a inuenté cest ouurage de distillation: combien qu'il y ait vne autre cause pour le regard des distillations qui se font par le feu chaud, lesquelles de tant que plus de fois sont reiterees, d'autant plus fortes se trouuent les liqueurs ainsi rectifices. Estant chose notoire, que le seu externe non seulement excite, mais encores augmente & multiplie le feu naturel enclos dans le compost de quelque chose

A DOX

que ce soit. Apres auoir separé & chassé de huy tout son phlegme superssu & inutile.

La cinquieme operation, dite coagulation, se fait par seu sec, non toutes sois violent: mais bien gracieux & doux, qui soit
vigoré par degrez selon l'exigence du copost, auec conservation de son humide radical: lequel autrement se pourroit exhaler estant excité & chassé par seu intemperé, & administré sans mesure ne moyent
par ainsi demeureroit son corps brulé &
gasté. Somme toute, qui voudra manger
bon pain & bonne viande, il doit auoir patience qu'elle soit cuite par vn seu mesuré,
ainsi qu'il appartient.

La sixieme operation, qui est sublimation, se doit aussi faire par seu sec, gradué de six en six heures au commencement pe tit, à sin d'euaporer l'humidité supersue du compost : & sinablement fort gros & violent, pour en extraire l'essence hors de ses feces, & icelle faire monter haut separément & par dessus les dites feces : laquelles sublimation se doit reiterer par tant des fois, qu'elle soit pure, claire & transparente. V by là pourquoy l'on a sinuété ceste operation de sublimation: laquelle ne conuiét

pro

propremét sinon aux corps spirituels; com me l'argent vif, soulphre, arsenic, sel armoniac, & semblables: à sin de leur oster d'yne part leurs phlegmes superflus, ensemble leurs soulphres impurs & combustibles, lesquels s'euaporent & consument par ceste sublimation estant bien faite & reiteree par plusieurs fois: d'autre part leurs terres feculentes demeurent au bas auec les seces: & la moyenne substance, qui se trou ue sublimee dans le vaisseau, est la pure &

vraye essence du compost.

Philips The State of the State

La septieme & derniere operation, qui est fixation, en laquelle ie comprens l'ouurage de reuerberation, requiert le seu du dernier & extreme degré; & a esté inuentee pour faire vraye consolidation des parties du compost; à fin de le rendre serme
& constant à la bataille du seu, qui est toute l'espreuue de la persection des corps; &
mesmement des metalliques; comme aussi
pour leur donner poids, & couleur sixe: pre
mierement en blancheur naisue, & sinablement en rougeur parsaite; qui est la der
niere couleur, à laquelle ce seu tasche d'amener toutes choses, qui luy resistent, &
demeurent perdurables auecques luy. Par-

13741 B 1

tant ie comprens en ceste operation de sixation les deux operations de dealbation & rubification, dont plusieurs Philosophes ont fait autres chapitres distincts, & separez, pour venir à la perfection de la tainctu

re phisicale.

Outre ce, ils ont fait vn autre chapitre pour le dernier de leur œuure, qui est appellé l'operation de ceration, ou bien ciba tion & fermentation: laquelle a esté trouuee pour deux fins principales. l'vne est pour donner à leur medecine bonne liqua tion ou fusion: à fin qu'elle puisse entrer & penetrer dans les corps impurs & malades, pour les guerir, depurer & nettoyer de toutes leurs ordures : c'est la vraye trasmutation & melioration non seulement des corps metalliques imparfaicts, mais aussi des corps humains alterez de maladies, pour les ramener à perfection & santé. l'autre fin de ceration & cibation est, pour multiplier ladite medecine en quantité: & pareillement en vertu, selon que l'operateur saura bien disposer & conduire son œuure:le voulant bien aduertir, que ceste ceration ne se peut faire sans adiouster humidité à son compost, apres qu'il l'aura l'aura bien desseché par l'œuure de sixation: & que ceste humidité se doit prendre de la racine mesme, & non de chose estran ge dudit compost: il sussit de ce petit mot dit comme en passant à tous bons entendeurs.

Ie say bien, qu'aucuns bien sauans, & qui pensent de plus approcher au blanc de ceste science d'Alchimie, diront, que toutes ces operations par moy recitees & declarees cy dessus ne sont necessaires à la composition de la taincture phisicale, qu'on appelle vulgairement la pierre philosophale: ou quoy que soit, qu'elles ne doyuent estre manuelles:par ce (disent ils) qu'il n'y faut qu'vne seule matiere, vn seul vaisseau, & vn seul forneau: & qu'apres auoir logé ladite matiere en son vaisseau propre bien clos, & iceluy colloqué sur feu conuenable, il n'y faut plus toucher: mais laisser faire à la nature : tout ainsi comme la semence virile vne fois enclose dans la matrice de la femme ne requiert autre quelconque artifice, ny aide, que de la cha leur naturelle du ventre maternel, pour la procreation d'vn enfant iusques à sa naissance. Parce que tous les anciens philoso-

phes ont affermé la vraye composition de ceste pierre, ou taincture phisicale deuoir resembler de tous poincts à la procreation de l'homme. Quant à moy, d'autant que ie n'ay encore attenté si haute chose, ie me deporteray pour ceste heure d'en parler plus auant: sinon qu'il me semble, & tien pour certain, que l'art peut grandement aider à la nature, tant pour luy acheuer ses intentions & desirs en toutes choses, com me aussi pour abreger le long temps, que ceste nature besognat seule requiert, pour les mener à fin. Ce que tresbien ont enten du & practiqué plusieurs desdits philosophes tant ancies que modernes: & par special le grand Theophraste Paracelse, comme il l'enseigne bien intelligiblement aux enfans de philosophie en son Apocalypse d'Hermes: & en plusieurs passages de ses autres liures.

Aussi mon intention principale ne tend qu'à monstrer, combien est vtile & necessaire la noble science d'Alchimie pour la medicine servant à la restauration & à la conservation de la santé humaine: puis que par icelle science nous sommes instruits, des moyens comment il faut prepa-

rer tous les simples, desquels nous voulons vser, en les depurat & despoillant de leurs phlegmes superflus, ensemble de leurs terres feculentes, qui les empeschent de produire leurs vigoreuses actions. Combien que plusieurs portans le nom & tiltre de medicins pensent n'auoir à faire de tout cela: parce que les mineraux metalliques, & autres ne leur sont en vsage: ains seulement les vegetaux: & plus encores les vltramarins, que ceux là, qui croissent en nos regions de par deça. Ie leur demanderoye volontiers pourquoy ils sont ainsi affectionez à ces vltramarins: veu que nous trouuons pareilles vertus specifiques, & d'aussi haut degré en plusieurs de nos simples de par deçà bien choisis: & que nous les pouuons recouurer tous recens, & purs sans aucune sophistication: au lieu que les vltramarins, ou la plus grande partie d'iceux venas de si loin, apres qu'ils sont paruenus iusques à nous, se trouuent vieils, moisis, chansis & pourris de la marine, & du charroy: ou autrement brouillez & sophistiquez par l'auarice des marchans, qui les vendent à nos espiciers & apothicaires ignorans. De quoy se sont plaints

tous les plus excellens docteurs, qui ont traicté la matiere des simples: comme Dioscoride, Pline, Theophraste, Galen, Oribase, Ruellius, Marcellus: & entre les modernes Fuchsius, Brasauolus, Manardus, & Mathioly, lesquels s'en sont formalisez bien grandement. Ce neantmoins comme il est difficile d'abolir vne vieille coustume, ou pour aplaudir au vulgue, lequel ne prise rien tant, que ce qui viet de loing, & couste bien cher, nos medecins pour la plus part se sont tenus ausdits simples vltramarins tels quels, à peine que ie ne dis incognus: en negligeant les nostres de par deçà, qui ne sont douez de moindres vertus en toutes choses: comme ie pourroye facilement faire apparoir par experiences particulieres.

le say bien, que pour toute response ils m'allegueront les authoritez des anciens docteurs en medecine: & ie leur repliqueray, que ces docteurs là, qui ont presque tous esté Grecs ou Arabes, n'ont eu cognoissance de nos regions, ny de plusieurs simples qui y croissent: & moins encore des incoles, ou de leurs complexions: ny des maladies regnans en nosdites regions: & que

& que par consequent leurs reigles & canons, medicamés & receptes ne nous conuiennent point, ainsi que parauanture elles pouuoyent lors conuenir aux hommes, & aux maladies de leurs regions vltramarines: auec ce que Dieu a esté si bon & pitoyable enuers tous humains, que leur enuoyant à chacune region ses maladies peculieres, il y a quant & quant mis les remedes propres: & donné vertus à ses simples ou croissans animaux, vegetaux & mineraux, pour les guerir parfaitement.

Outreplus, ces docteurs anciens Grecs & Arabes, qui ont fondé vne grande partie de leur medicine sur les simples vegetaux de leurs regions, ont consideré leurs vertus & proprietez seló qu'ils les ont trou uees en iceux estans frais & recentement cueillis. Mais nous ne les pouuons auoir tels de par deçà, qui ne soyet du tout secs: sinon pourris & gastez. Or est il bien vray, qu'vne bonne partie desdits vegetaux quelque part qu'ils puissent croistre tant deçà, que delà la mer estans secs n'ont telles vertus comme les recents: mais toutes contraires: comme si les recents sont laxatifs, au contraire les secs sont restrictifs;

ainsi qu'il est notoire aux bons phisiciens, qui ont experimenté leurs vertus en l'vne & l'autre maniere.

Et si toutes ces raisons ne suffisent à ceux, qui sont ainsi du tout attachez aux docteurs & aux medicamens vltramarins: ie leur voudrois bien encore demander, comment ils laissent mourir tant & tant de malades, qui se sont mis entre leurs mains? ou bien pourquoy ils ne peuuent guerir des ladreries, hydropisies, apoplexies, paralisses, contractions de membres, mal caduc, fieures quartes, hectiques, podagres, gonagres, chiragres, arthetiques, schiatiques, & autres maladies, qu'ils repu tent perpetuelles & incurables: ils me pourront sur ce respodre auec le bon hom me Accurse glosateur des loix Romaines: Græcum est, ideo non legitur. Et ie dis que nostre souuerain Dieu par sa bonté a donné aux humains les moyens & remedes trescertains, propres & conuenables contre toutes sortes de maladies, qui les peuuent assaillir, en quelque region que ce soit: mais leur ignorance d'vne part, auec leur incredulité d'autre part sont cause, qu'ils ne cognoissent rien esdites maladies,

dies, ny aux medicamens necessaires pour les guerir: en quoy se descouure manisestement l'incertitude de leur science, n'estant sondee que sur la simple lettre morte: & non point sur la lumiere de nature, laquelle a ses raisons phisiques, & demonstrations oculaires par vrayes & certaines experiences. A tout le moins deussent ils penser, puis que les maladies cy dessus nommees sont de si haut degré, qu'elles ne se peuuent guerir par vegetaux yltramarins, ne autres, ne par les racines, semences, fruicts, gommes, & resines procedans d'iceux, qu'il faut donques chercher ailleurs les medicamens de plus haut degré: & tels qu'ils puissent vaincre, ou pour le moins esgaller le degré desdites maladies par eux reputees incurables.

Ie veux donques bien aprendre à ceux, qui ne le sauent pas, comment le corps hu main s'appelle (ainsi qu'il est vrayement) vn petit monde contenant les quatre elemens: & que chacun d'iceux fait en iceluy son office, tout ainsi qu'ils sont en ce grand monde. Car la terre y produit ses croissans animaux, vegetaux & mineraux: l'eau pure & claire dés sa source par vn nombre insi-

223

ni de riuieres & de ruisseaux decoulans iusques à l'extremité de chacun membre du corps les arrouse, nourrit & fait croistre. L'air serain & beau les fortifie & entretient en toute allegresse. Et le seu amiable les digere & meurist en douce & sauoreuse substance. Mais si la terre n'est bié proprement cultiuee, si les riuieres & ruisseaux viennent à se tarir par secheresse, ou se desborder par inondations, si l'air s'espoissir en noires nuces & vapeurs fetides: pareillement si le seu vient à se debiliter, ou trop augmenter: ainsi que tous ces exces aduiennent ordinairement par nostre faute, & mauuaise conduite: alors dis ie, il faut necessairement, que tous les croissans enclos dans ce petit monde en patissent:& se corrompent chacun selon qu'il aura esté attaint, & infecté de l'intemperie & malice de son element.

Outreplus, il faut entendre comme le ciel a sept planetes principaux dominateurs sur les autres: & la terre a sept metaux plus solides que tous ses autres mine raux: pareillement au corps humain y a sept membres principaux dominateurs sur tout le corps: à sauoir le cœur symbolisant

auec

auec le soleil du ciel, & le metail de l'or de la terre: le cerueau auec la lune du ciel, & l'argent de la terre: le foye auec le mercure du ciel, & l'argent vif de la terre: le poulmon auec le Iupiter du ciel, & l'estain de la terre: la rate auec le Saturne du ciel, & le plomb de la terre: les roignons auec Venus du ciel, & le cuyure de la terre: & le fiel auec Mars du ciel, & le fer de la terre. Laquelle symbolisation, ou rapport naturel ne leur prouient d'autre chose, sinon de ce, que lesdits metaux tant de l'homme que de la terre sont deriuez, engendrez, regis & conduits de ces planetes celestes respectiuement. Qui est la cause pourquoy tous les philosophes se sont accordez à ceste opinion, que les astres & l'homme engendrent l'homme: & que ceste basse terre, comme vne mere fertile, conçoit & pro duit seulement les choses, qu'il plait au ciel pere de tout engendrer en elle: & icelles produites sur la terre, ce pere a le soing de les nourrir & entretenir, comme il fait, de sa propre substance.

Il s'ensuit donc, que lesdits principaux membres interieurs de l'homme se peuuent appeller proprement metalliques:

E 5

comme aussi leurs maladies s'appellent metalliques en general,& chacune d'icelles en special du nom du metal corporel, quise trouve affecté & malade. Par ou nous pouuons aussi comprendre, que le plus prochain & conuenable remede se doibt chercher, & extraire de son semblable me tal terrien, & ce par le moyen de ceste noble science d'alchimie. Voylà pourquoy i'ay bien voulu toucher les points des prin cipales operations d'icelle, comme tresnecessaires à tous ceux, qui voudront exercer dignement la medicine, tant pour l'in terieur, qu'aussi pour l'exterieur des corps humains: ne voulant toutesfois nier, mais au contraire affermer, que ces grandes ver tus, ne sont encloses seulement aux metaux, ains aussi que plusieurs autres mineraux les esgalent, ou pour le moins les approchent de bien pres: comme sont les essences de l'antimoyne, des perles, des coraux, des rubins, esmeraudes, iacintes, saphirs, grenats, christal & autres, qui ont chacun sa proprieté specifique, pour ayder non seulement ausdits sept principaux membres interieurs, mais encores à tout le reste des corps humains, plus que ie ne fauroye sauroye dire ny escripre.

Mais, disent plusieurs, tels medicamens tirez des essences metalliques & minerales sont fort violens, à raison de leurs chau des qualitez: toutesfois ils s'abusent grandement en cela ne faisans aucune differen ce des medicamens, qui se prennent par la bouche, & ceux qui s'appliquent en l'exterieur: car à ceux cy veritablement il faut des medicamens graduez selon le degré des maladies: & ne se persuader point, qu'a uec vn brin de persil on puisse guerir ces vieux malings vlceres, fistules, loups, chan cres, polypus, noli me tangere, ou autres semblables. Et quant aux medicamens internes, parce que ie n'approuue rien tant comme les pures essences des mineraux, ie veux bien dire, & c'est chose vraye, que leurs quintes essences bien dextrement tirees sont douces & benignes, n'estas chaudes ny froides, mais temperees de tout bo & iuste temperament: à cause de quoy aussi de leur vertu naturelle elles rameinent à bonne temperature tout ce, qu'elles trouuent desreiglé és trois premiers de la com position de l'homme: qui sont mercure, soulphre, & sel: apres en auoir separé &

chassé dehors toutes leurs impuritez, & excremens veneneux, qu'on appelle matiere peccante. Bien est vray, que le sage medicin les doit administrer par doses me surees eu esgard à la complexion du malade: à la qualité, & au degré de sa maladie: car le poids de trois ou quatre petis grains d'vne bonne quinte essence metallique, fera trop meilleure operation, que ne sauroyent faire trois charretees des vegetaux vltramarins, ny autres: & sans trauailler aucunement l'estomac, ny faire violence à aucun des membres interieurs: ains plustost les pourront conforter, & vigorer de tous poinces la nature de l'homme: ie parle de ce que ie say: & rends tesmoignage certain de ce, que i'ay veu par plusieurs belles experiences. Et qui voudra estudier en ceste noble science, quat & quant mettre la main à la paste, s'il y est appellé de Dieu, ne pourra faillir à trouuer la verité d'icelle: & plus auant que ie n'ay dit pour le present.

Or retournat au propos de nostre science d'Alchimie, plusieurs philosophes se sont tourmentez pour trouuer, qui a esté le premier inuéteur & operateur d'icelle.

Aucuns

Aucuns ont dit que ce fut vn Philosophe nommé Alchimus, duquel est venu le nom d'Alchimie. Les autres disent auec raisons fort apparentes, que ce fust Adam le premier homme creé de Dieu au sixieme & dernier iour de son operation, & à son ima ge & semblance: auquel homme Dieu le createur donna dés lors vraye & parfaite cognoissance de toutes les choses du mon de, qu'il auoit creées és cinq iours precedens: auec plein pouuoir & seigneurie sur icelles, pour en vser à la conseruation de son estre, & de sa posterité. Disent aussi qu'apres le deluge vniuersel Noé trouua ceste science entre les autres arts liberaux, que les anciens plus sages du premier siecle auoyent insculpez en deux piliers, l'vn de bois, l'autre de pierre: & iceux plantez en la valee de Hebron, pour seruir à ceux de l'autre siecle futur: qui est celuy auquel nous viuons encore maintenant par la gra ce de Dieu.

Quant à mon opinion, prenant de plus haut l'origine de ceste noble science: ie croy, que ce mesme grand Dieu createur de l'vniuers a esté le premier, & le plus excellent Alchimiste, qui fut, ny sera iamais.

Carainsi que nous lisons és liures de l'escri ture saince, n'ayant creé dés le commencement qu'vne matiere confuse, qu'on appelle cahos, il en a tiré les quatre elemens, & iceux separez l'vn de l'autre: collocant chacun en son propre vaisseau par sa diuine Alchimie. Le premier est le ciel, qui cotient le feu au plus haut lieu, comme le plus excellent: & au concaue d'iceluy est l'air:puis l'eau: & finablement la terre, qui fait le centre des trois l'enuironnans, chacun en son ordre ne plus ne moins que le iaune d'vn œuf fait la terre & le centre : estant enuironné de la glaire, qui est l'eau: & ceste glaire enuironnee d'vne peau, qui represente l'air: & pour le dernier c'est la coquille de l'œuf, qui represente le ciel enuironnant & contenant dans son concaue les autres trois distinctement separez, & colloquez chacun en son lieu, & propre vaisseau: & ce par telle façon, qu'ils ne se peuuent plus entremesler, ny remettre en ceste masse confuse, ou ils estoyent du comencement: comme aussi ne peuuent ils entreprendre l'vn sur la dignité de l'autre: estans coarctez, & contraints demeurer separez chacun en son propre lieu, ainsi que nous nous auons monstré par l'exéple de l'œus: lequel encores qu'il soit tourné & rollé de quelque costé qu'on voudra, si est ce, que le iaune demeure tousiours au centre: & ne s'entremesse aucunement auec la glaire: ny ladite glaire auec la peau: laquelle est encore separement couverte d'vne coquille contenant le tout, ainsi comme dit est. Voyla donc comme ce tresexcellent Alchimiste Dieu le createur a traitté ceste grossiere masse corporelle, separant le subtil du gros, le pur de l'impur: & colloqué chacune partie en son propre vaisseau.

Outre ce, n'a il pas fait vne autre belle operation d'Alchimie en separant le iour de la nuict, & la lumiere des tenebres? Ne voyons nous pas iournellement ses autres operations alchimistiques? comme sont les putrefactions & dissolutions de toutes semences apres qu'elles sont iettees en la terre pour faire nouvelle generation de leurs especes. Et pareillement les belles distillations par pluyes & roses, qui sont sor tir & croistre les dites semences. Les sublimations par atraction de vapeurs fetides, & aucunes si abondantes, qu'elles pourroyent submerger, ou autrement gaster les

gulations, & fixations qui sont faites par plusieurs & differés degrez de son seu alchi mistique, iusques à ce que tous les fruids creus en ladite terre soyent reduits à parfaite maturité prests à recueillir: & lors aussi nous y trouuons la vraye multiplication de tous ces fruids grandement sussissante pour nostre sustentation: il ne reste sinon, que de tout nous voulussions bien vser, a-uec action de graces à sa diuine maiesté.

Ie diray d'auantage, que Dieu fait ordinairement dedans nous (qui sommes son petit monde) plusieurs autres operations d'Alchimie non moins excellentes & admirables, que celles qu'il fait en ce grand monde. Cartout premierement, si tost que la semence virile en forme d'eau claire & blanche est enclose dans son propre vaisseau, qui est la matrice feminine, il commence d'y besongner par l'ouurage de putrefaction: dont s'ensuit la dissolution, qui dispose le compost à la separation de ses elemens: & apres separation faite tant du phlegme inutile, que des feces terrestres par l'ouurage de distillation, il vient à la coagulation des pures parties dudit compost.

post. En quoy se void vn commencement de transmutation admirable. Car ce qui estoit au commencement en forme d'eau claire & blanche, se trouue transmué en vne masse de chair solide & rubiconde, que les Latins appellent Embrionem: & lors sur ceste masse de chair se fait vn autre merueilleux ouurage d'alchimie: car elle se diuise & separe en plusieurs parties s'entretenans en vn tout : comme la teste, les bras, les iambes auec tout le reste du corps: & dans iceluy plusieurs autres mem bres distincts l'vn de l'autre, ayans chacun son office peculier, & colloquez chacunen son propre lieu sans aucune confusion. Apres cela, par l'ouurage de conionction ce grand operateur conioint l'ame & l'esprit auec ce corps: & puis le passe par l'ouurage de fixation: à fin que l'vnion de ces trois se face plus forte & indissoluble. Apres s'ensuit cibation, par laquelle ce corps animé & viuisié de l'esprit s'augmente & multiplie en quantité, & en vertu de jour à autre, iusques à ce, qu'estant le premier compost amené à la fin pretendue par diuerses operations de ce grand Alchimiste nostre Dieu, finablement il le vient à tirer hors

de son vaisseau maternel en forme d'vn

bel enfant viuant & parfait.

Nous voyons d'auantage l'excellente transmutation, qu'il fait conuertissant en chair, os & sang le pur laict, dont cest enfant est nourry par vn long temps: & de mesme fait il en nous du pain, que nous mangeons, & du vin que nous beuuons iournellement.

Ne voyons nous pas encores, comment il exerce dedans nous continuellement toutes ces belles operations d'Alchimie, commençant tousiours à la putrefaction pour venir aux autres ouurages de solution, distillation, & separation: & ce tout en vn mesme fourneau:non pas en vn seul vaisseau, mais en plusieurs, & par diuers degrez de seu: car en l'estomac se fait la premiere putrefaction des viandes, que nous prenons pour nostre nourrissement, auec separation du gros & du subtil, du pur & de l'impur: en ce faisant le gros & impur, qui est l'excrement sulphureux, est renuoyé aux boyaux, lesquels en prennét leur nourriture necessaire, & le surplus reiettent, & l'expulsent dehors: mais le pur & subtil du nutriment vniuersel, qui est vn

vn suc appellé des Grecs hylos, ou chilus par les Latins, de l'estomacs'en va au foye, qui en fait vne autre digestion, & separation pour le mieux affiner: & du plus fin & subtil il faict le sang pur & net, duquel il se nourrit: & pareillement en nourrit ses compagnons tous les autres membres du corps, enuoyant à chacun sa portion congrue par les vaines dudit corps, qui sont ses messagers & postes diligens: le reste se renuoye aux roignos, lesquels en font vne troisieme putrefaction & separation, retenans à eux le meilleur: & au demeurant, qui est l'vrine & l'excremet du sel, ils baillent congé de s'en aller à la vessie par ses propres canaux, iusques à ce que la vertu expultrice s'y rencontre pour l'expulser dehors.

Nous voyos aussi, comme ce tres excellent alchimiste nostre bon Dieu a basty son four (qui est le corps de l'home) d'une si belle & propre structure, qu'il n'y a rien à redire; auec ses souspiraux & registres necessaires: comme sont la bouche, le nez, les oreilles, les yeux: à sin de conseruer en ce four une chaleur temperee, & son seu con rinuel, aeré, cler, & bien reiglé pour y faire

toutes ses operations alchimistiques. Et comme à ceste sin il a colloqué dans ce four trois beaux vaisseaux distincts & separez par vne tresbelle ordonnance. Dont le premier est la teste : la quelle contient le cerueau, & dans iceluy tous les sens de l'homme: duquel cerueau procedent aussi les nerfs, qui lient & entretiennent tous les membres du corps: & luy administrent les facultez de mouuoir & de sentir. Le second vaisseau est l'estomac, qui contient le cœur premier & principal membre de tout le corps: & de ce cœur procedent les arteres, qui sont comme petis tuyaux dans lesquels sont portez, comme en maniere de distillation, les esprits vitaux en & par toutes les parties dudict corps. Ce second vaisseau contient aussi l'air necessaire pour l'entretenemet du feu alchimistique: auec ses soufflets, qui sont les poulmons és deux costez du cœur, pour luy conseruer sa chaleur, & neantmoins le refrigerer tout doucement, le preseruant de combustion là & quand ledit seu se trouveroit desreiglé par quelque excez. Le tiers vaisseau est le ventre : qui contient le foye geniteur de tout le sang humain: & duquel foye procedent

les veines, qui sont autres tuyaux par lesquels ce sang est distillé & coduit iusques aux extremitez de tous les membres du corps, pour nourrir & substanter vn chacun d'iceux: & en ce faisant leur administrer les forces naturelles.

Et cobien qu'en ces trois vaisseaux prin cipaux se facent diuerses operations, toutesfois le tout ne tend qu'à vne seule fin: qui est d'amener, & entretenir ce corps en vne perfectio de santé, & longue vie: auecques la vertu & puissance de multiplier son espece infiniement iusques à la confommation du monde.

Aussi l'on voit que ces trois vaisseaux s'entretiennent de bon accord seruas l'vn à l'autre des meilleures choses qui sont contenues en iceux. Car le foye contenu au ventre, & qui est le maistre d'hostel, ou despencier de tout le corps, enuoye par certains propres canaux le nutriment, qui est necessaire au cerueau: comme aussi fait il le nutriment necessaire au cœur par la grad veine, qui porte le sang au costé droit d'iceluy: & de là transperce iusques au milieu dudit cœur, ou ce sang s'affine d'auan tage: & tellemet que le plus subtil perçant

plus outre, & estant paruenu iusques au costé gauche se couertit en esprits vitaux: dont se remplissent les arteres, qui prennent leur source & naissance du mesme costé gauche dudit cœur: & de là rampent par toutes les parties du corps, ainsi que nous auons ia dit cy dessus. Il sort encore vne veine, qu'on appelle arteriale du costé droit de ce cœur : laquelle porte au poulmon le sang necessaire pour sa nourriture. Et du costé gauche sort l'artere venale:par laquelle ce cœur reçoit l'air du polmon, qui luy est necessaire tant à refrigerer sa chaleur, comme aussi pour attirer les vapeurs inutiles, qui naissent auec les esprits vitaux: à fin de les esseuer, & faire sortir hors du corps par la veine, ou canne gutturale.

Parceste harmonie des membres corpo rels, & au moyen du bon secours que l'vn fait à l'autre, le corps se conserue sain & parfait, doué de quatre vertus ou facultez principales: sauoir est l'attractive, retentiue, immutatiue, & expulsiue: par lesquelles vn chacun membre attire à soy le nutriment qu'il luy faut : l'ayant attiré le retient: le retenant il le conuertit & mue en sa substance: & ce qui est de superflu, il l'ex-

pulse dehors.

Outreplus, l'on voit come tout le corps humain contient la forme & figure d'vn alembich tresbeau, & propre pour toutes les operations alchimistiques. Car la teste y sert de chapelle: & le surplus dudit corps est comme vne cucurbite contenant la ma tiere, de laquelle ce souuerain alchimiste fait ses operations. Et entre la cucurbite & la chapelle y a le col si bié ioint à l'vn & à l'autre, que rien ne peut exhaler hors du vaisseau pour se perdre. Mesmes d'autant que dans ce col y a deux passages distincts & separez: l'vn est la canne du gosier pour le passage des esprits, & de l'air prouenant des poulmons. Et l'autre est la gueule pour le passage du manger & du boire, qui descend au ventricule pour le nutriment du corps: le tout par vne tresbelle ordonnace.

En somme, qui voudroit discourir par le menu toutes les belles operations alchimistiques, lesquelles nostre Dieu fait ordinairement en ses grand & petit monde, il s'en pourroit faire vn bien gros liure: & de grande doctrine: que ie laisse pour le present à considerer plus prosondement

F 4

aux amateurs de ceste noble science: me contentant d'en auoir fait ces ouuertures comme en chemin faisant pour aller plus outre.

Il est bien vray, que se faisans dans les corps humains toutes ces belles operatios alchimistiques, desquelles nous auos parlé cy dessus, il y suruiet souuetes sois des gran des fautes & erreurs: non par la faute du grad operateur, lequel auoit singulieremet bié disposé toutes choses necessaires à son œuure: mais la faute vient aucunefois du four mal basty, ou mal entretenu: autrefois des vaisseaux fellez, ou mal sigillez: & le plus souuet du feu mal administré sans ordre ny mesure, pour estre quelquesois trop grand, autre fois trop petit: le tout par la coulpe du valet, sous la charge duquel tou tes ces choses ont esté commises & delaissees. Voyla dont procedent les maladies, qui nous suruiennent iournellement.

Et pour conclusion ie dis encore ceste fois, qu'il n'y a science au monde (apres la saincte theologie) qui soit tant necessaire, ny tât vtile aux humains, qu'est ceste noble science d'Alchimie: à laquelle ie conuie tous gentils & vertueux esprits, qui ont

deuat les yeux la crainte de Dieu, l'amour du prochain, & leur honneur en bonne recommandation vers tout le monde. Sous condition toutesfois, qu'ils reietteront au loing toutes procedures & receptes sophi stiques, inuentees outre, & contre l'ordre de nature: & qu'ils ne se laissent plus abufer ny tromper par vn tas d'ignorans & seducteurs, lesquels vont circuant le monde pour vendre leurs fausses receptes au blac & au rouge: soit par congelations & fixations d'amalgames de mercure: fixations & tainctures de lune: dealbations de Venus: minieres ou œuures parfaites qu'ils disent auoir les vns sur Iupiter, les autres sur Saturne, & plusieurs sur l'antimoine, ou sur autres marchasites: auec toutes leurs multiplications d'vn tiers, ou d'vne moitié, qui ne sont rien, que toutes abusions, faussetez&piperies: carpartous ces moyés là iamais il ne se fera vraye transmutation ny melioration des metaux imparfaicts en substance:ne pareillement en couleur, qui soit permanante sur le feu és espreuues de l'or ou de l'argent : comme à la coupelle, ou à l'eau forte, au cyment, ou à l'antimoine. Et combien qu'il se puisse faire quel-

que alteration des corps metalliques pour resister à la premiere espreuue: toutes fois à la seconde, ou à la troisseme tout s'en ira par l'air en fumee. Car pour toute verité, il n'y a point de taincture qui soit fixe & permanente, ne aussi qui soit suffisante pour oster & consumer les impuritez des metaux, sinon celle de la pierre, ou taincture phisicale: la quelle se doit composer de matiere homogenee: & de la propre semence de nature, sans addition d'aucune chose estrange: ainsi que resmoignent les bons philosophes: lesquels s'accordét tous vnanimement à ceste maxime, que tous les indiuidus de la nature basse, sans nul excepter, ont chacun sa propre semence pour se coseruer, propaguer & multiplier leurs especes en nombre infiny iusques à la con sommation du monde. Tellemet que pour faire de l'or il ne faut pas chercher la semence ailleurs que en l'or mesme. Ce qu'a dit Augurel en sa Chrisopeye fort elegam ment en peu de paroles: En l'or(dit il)sont les seméces de l'or. Et peu apres, Ceste semence est vn esprit enclos & lié dans vne grosse masse de corps, ainsi comme dans vne prison: lequel ne demande sinon la main main du bon artiste pour le dessier, & mettre en liberté: à sin de pouuoir monstrer ses vertus & forces royales, que nature luy a coferees par dessus tous les autres metaux de la terre ses freres puisnais: ausquels il desire faire du bien: & les auancer en mesmes honneurs Royaux: parce qu'ils sont tous sortis ou deriuez d'vne souche


& de mesme lignage.

Et partant les hommes sages & bien auisez pourront desormais descouurir au moyen de nostre presente instruction & aduertissement tous les abus de ces trompeurs: & cognoistre apertement leur erreur & ignorance: premierement en ce qu'ils n'operent pas de matiere deue: & ne sauent que c'est de ceste semence: ny de la premiere matiere dont la nature a composé, & compose iournellement chacune de ses especes, pour en faire nouuelles generations & multiplications. Secondement pource qu'ils ne suyuent pas les vrayes operatios de ceste sciece, telles que nous les auons declarees cy dessus, auec leur ordre: lequel ne doit estre obmis, ne peruerti ou preposteré en aucune maniere: car en cestuy ordre gist tout le secret: &


qui aura des oreilles pour ouyr, si l'entéde. Auec ce il se faut tousiours constamment tenir à ceste autre maxime dependant de la precedente: à sauoir que l'art n'est sinon la chabriere, & l'aide de nature, pour abreger le temps en luy acheuat ses desirs : qui tédent tousiours à la perfection & propaga tion de ses coposts. A raison de quoy ceux qui entreprendront à faire ceste pierre, ou taincture phisicale, doyuent auiser diligem ment à ce principe, que nous auons bie icy voulu reueler: à fin qu'aucun ne setrompe, ou se laisse tromper desormais : qui est de n'y mettre aucune chose eterogenee, ou estrange de la nature: autremet ils s'y trou ueront trompez. Et ne m'en croye qui ne voudra:mais celuy qui s'y mettra indifcretement, n'en rapportera que tout ennuy & dommage:ie l'en asseure, comme bien experimenté depuis trente ans, que i'ay premierement cognu de ces circulateurs:employé du téps, & despédu de l'argent beaucoup pour experimenter leurs receptes:ou ie ne trouuay onquesvne seule verité quat à la vraye transmutation metallique: non plus que de leurs multiplicatios: sino quelque fois, que i'ay aperceu, comme de mon or &

or & de mon argent ils auoyent tresbien sceu multiplier le leur par finesses & tromperies: de quoy ie ne veux plus inculper autre que moy mesme, & ma temeraire cre dulité: laquelle s'estoit lors appuyee sur leurs belles paroles, amples promesses, & affirmations par grands & estroits sermés. Aussi la fin de tels seducteurs c'est le gibet: comme par vniuste iugemet de Dieu. Car apres qu'ils ont prou soussé, & formé de faux billons, ne trouuans maistre de monnoye,ny orfeure qui leur en baille argent, ils les employent à forger de fausse monnoye. Et voyla pourquoy à l'occasion des meschans vne si noble science a esté vilipendee. Mais comme il ne faut prendre son exemple au mal pour l'ensuyure, aussi ne faut il pour les abus des mauuais contemner, & moins encore condamner les choses bonnes & sainctes. Or soit benit le nom de ce grand Dieu immortel, qui donne cognoissance de la verité non seulement de ceste belle science d'Alchimie, mais aussi de toutes autres à ceux, qu'il luy plait. Amen.


Omnia probate, quod bonum fuerit tenete. Paulus I.ad Thessal.cap.vltimo.




Early European Books, Copyright © 2012 ProQuest LLC. Images reproduced by courtesy of The Wellcome Trust, London. 3679/A




Early European Books, Copyright © 2012 ProQuest U.C. Images reproduced by courtesy of The Wellcome Trust, London. 3679/A




Early European Books, Copyright © 2012 ProQuest LLC. Images reproduced by courtesy of The Wellcome Trust, London. 3679/A





Early European Books, Copyright © 2012 ProQuest LC. Images reproduced by courtesy of The Wellcome Trust, London. 3679/A



Early European Books, Copyright © 2012 ProQuest LLC. Images reproduced by courtesy of The Wellcome Trust, London. 3679/A